

孝 韞 豐 豆 縣 志

同治十二年二月興
脩光緒三年十一月
開雕五年四月工竣

重脩孝豐縣志序



孝豐秦故鄣地明以前屬安吉至宏治間始分設縣治天目峙其南苕水遶其北關隘踞獨松鐵嶺之險物產沃饒桑竹木之饒士習民風猶為近古壬申歲余來宰是邑地經兵燹滿目瘡痍田畝半就荒蕪流

孝豐縣志

序

一

亾尚多未復廣為招集滋其利源興廢振墜於焉匪易而數年來經營草創不憚辛勞如築隍浚池脩學建署以及橋梁道路育嬰養濟凡一切有益地方而便於民者業已次第舉行規模粗具而惟脩志一役竊有志而未逮也會大憲有檄各屬脩

郡縣志之令遂與邑之人悉意講求留心
採訪而故老者民無一存者僅得康熙癸
丑邑令羅君纂脩舊志事成促迫簡畧殊
多而又時隔二百年滄桑陵谷今昔懸殊
賦役戶口增損或異與夫忠孝節義題詠
著述歲有其事地有其人又不知凡幾矣

孝豐縣志

序

二

况復劫換紅羊冤沉碧海貞同日月義薄
風雲記載不得不詳表章不得不備事關
得失豈淺鮮哉爰廣前志補其闕遺別類
分門彙為十卷方輿水利履勘出自躬親
人物執文蒐羅半由掌故建置因時之制
食貨酌土之宜職官選舉經世之大端旁

覽災祥致治之要務事苟有係乎政教書
必務致其慎詳庶

朝文獻不同祀宗之無徵而下邑人文足
備輶軒之採擇惟願後之守斯土者踵而
增脩之不負 大憲孜孜求治之意而於
風俗人心有裨益也志創脩於甲戌仲秋

孝豐縣志

序

三

閱五載而成其分脩諸君子姓氏具列於
左以誌不忘是為序

光緒三年歲次丁丑七月知孝豐縣知縣
大興劉濬謹序并書

孝豐縣志舊序

原序

陸

崑

明監察御史歸安人

古列國皆有史自秦罷侯置守郡邑有志卽國之史防於禹
貢備於職方氏凡分野形勝公府建置吏治民風物產悉載
焉所以存故實昭勸戒乃政務所先而弗可緩者然非深達
治體優於崇政豈遑及是耶吳興郡始三國時爲江左文獻
之地歷漢唐宋沿革靡常入皇明循元之舊惟改長興州爲
邑暨轄歸安烏程德清武康安吉而安吉之邑與長興壤地
相接僻處西南盤據天目九龍諸山獨松石虎諸嶺遼遠公
府鄙野難理緩則弛急則變其膏腴山林之利併入豪右武

孝豐縣志

原序

一

斷鄉曲而賦役獄訟反在所後永樂正統山寇吳梅二姓嘯
聚至勤王師討平成化末郡守王公珣乃建議割長興晏子
鄉三鄉附安吉而以安吉孝豐等上九鄉自爲一邑但公府
經始城池未備民居鮮少吏治苟簡湯許二寇復槩牙其間
乃請兵戡定於時撫按藩臬深以令長爲艱白諸銓司遴選
泰和郭君治嘉靖癸未夏蒞任不鄙夷其民清嚴律已而濟
以勤敏葺年百務就緒井里改觀文教聿興人才聯第與上
邑抗衡仕優之暇定爲義例屬學諭陳君表采輯成志取其
覈而信及係事體之大者若諸仙釋奇怪無補於政者畧之
大率准一統誌遵時制也間示請序其端予嘗慨吳興名郡

惟志載舛遺議欲纂修而未遑以名宦人物尤在所先肆輯
爲名賢錄庸備考訂邇德清方尹日乾編纂成志予喜鄰邑
之得人茲觀此編又附名永久豈非幸歟雖然事之成否顯
晦固自有時其實則在乎人焉耳斯邑士民因文獻之足徵
尙其體賢尹之用心勉修行業保族宜家求無負於聖朝休
養生息之恩庶亦有光於斯誌哉郭君字昌修號中洲英俊
之才該博之學弱冠以詩經魁江右故爲政知所先務如此

重修序

黃朝選

湖以西列郡三而湖當震澤之衝湖之屬有七而孝豐踞天
目之勝舊爲安吉縣西南隅以其地林篁僻遠易服難馴事
多阻格刺史以白之三臺使臣請自縣治而南數十里許更
爲邑安吉爲州疏上得報可遂斬蓬藿而巋然邑則弘治之
改元始矣邑志則編於嘉靖初郭令草昧創定謀野之裨謀
而已去今八十餘禩而山川之所葱鬱人文之所濬發併麗
譙雉堞之所新而滄桑之所變月改盼而歲煜其華儻因仍
前志罔所增緝令芳踪奇軌湮沒於崗嵐嶂煙甚非周官圖
職方輿經野體國意也余承乏茲邑退食之餘與邑博王君

孝豐縣志

原序

三

錦江君大簡張君子恩定爲條例以屬諸生吳宗相王用卿
王紹通周維新等共彙次之其類方輿則地圖至風俗爲條
六類建置則公署至亭榭爲條十五類食貨則戶口至土產
爲條四類職官則縣令至名宦爲條十一類選舉則薦辟至
封蔭爲條七類人物則鄉賢至仙釋爲條七類災祥則災異
祥瑞爲條二類旁覽則古蹟至寺觀爲條三類藝文則御製
至詩賦爲條四總其帙凡二卷梓成而屬序於余余輯是書
幸其華不蔓核不俚簡不漏一寓目而三才大猷彬彬眉睫
甯敢以狐左之管俾蕞爾邑微文獻哉遂不辭而序其略如
此萬曆壬寅季秋望日知孝豐縣事金谿黃朝選撰

重修序

王宏仁

今天下車書一統矣

詔令溥海郡縣通修志書甚盛典也西蜀羅君以甲午名雋爲
豐邑宰爰輯舊志而更新之書成余覽竟而思邑之有志與
國之有史一也史關天下之大志備郡縣之詳其義例紀載
良非漫然無所稽考治理於是乎備風教於是乎維取一時
紀述者之心合之百千萬輿人之心以通於

朝廷教養百姓之心無不源流畢貫焉雖一事一節之微必非
無故而存一民一物之細必俟徵實而見故其書足以論定
於當時而傳信於後世俾夫展卷者如身履其地而知人民

孝豐縣志

原序

四

之何以輯柔也風俗之何以敦厚也山川險阻之何以控制
也財賦生息之何以饒裕也往古來今之治否得失何以相
尋也職官賢否之何以昭勸誡也以閱者之心通之紀述者
之心於以施之治理播之風教卽此書而具不必遠覽冥搜
已然則義例紀載洵豈漫然無所稽攷者哉因思不裕經世
理物之量不能成經世理物之書羅君雖在百里而治行殊
自軒軒日上卽所紀不過二百餘年之事而其爲文之核而
信簡而該允有益於治理有裨於風教余得藉手以成吳興
之盛事噫嘻抑何幸歟遂援筆而爲之弁其首時

皇清康熙十二年癸丑孟夏月朔旦中憲大夫知湖州府事加

四級王宏仁題

孝豐縣志

原序

五

重修序

羅爲廣

志非史也而同於史載筆而書大義炳如春秋之別於晉楚史且進而爲經志豈易言哉然有是邑卽不可無是志山川疆域戶口財賦以至守令政績忠孝節義不可泯沒卽古今題詠紀述有關於世者亦必搜輯而備載之登風俗之良書而上之

天府官茲土者不能已已況

聖天子在御方輿內外車書輯一下令郡縣編纂成書用資採覽不揣鄙陋方以前志闕略正在修輯而頃又奉檄刻期竣事雖杼軸不敢匠心而訪求邈難遐索蓋邑建自勝國而山

孝豐縣志

原序

六

川如故沿革猶新前此豈乏紀載然法不得書卽近今分壤而治與舊隸不同亦例不得書故豐之可載者斷自弘治丙申後距今二百餘年事蹟而已而邑之有志肇自郭泰和繼於黃金谿迄今七十二年遺文佚事闕略實多自非延訪參訂豈易周悉爰請明經張蓮王萃亨王恪文學王美中王雲蒸章雲初等分類旁搜補綴成編述舊章以徵信遵

時制以更新於前無所遺於後爲可久敘略倣之年表名賢衷之論定紀災祥以示修省收詩賦以備採風其書告竣余反覆閱之雖於南荆遺牒愧乏博綜要於東魯刑書嚴求簡核較之前志可謂得其體要矣蓋景高山之秀者天目雙清

滙江淪之流者董源分衍溪山縉異名碩流輝前有聞人後多紹述方來未艾自應改觀覽斯志者不下堂階可以得治理之先資矣然余有言者前志所載無論矣近今遺愛在人三代直道尙未泯也人心猶爲近古不大可見歟司牧者其何以副斯民而無愧哉余方以自矢而又將以此書爲後人金鑑也時

皇清康熙十二年歲次癸丑春王正月穀日知孝豐縣事蜀南
堯羅爲賡題

孝豐縣志

原序

七

孝豐縣志後序

訓導 李煥文

今天下郡縣志各用纂輯彙成大一統書垂之無窮甚盛事也
余典豐庠六載會遷麗水諭將去西谿羅父母留以監督志局
不獲辭三閱月而書成遂謂余不可無所識竊以邑有志猶國
有史史擅三長辭兼體要維志亦然故君子難之在載筆者以
道爲衡以義爲斷千載微文炳如星日則山川靈秀旣發光華
而人文事蹟不嫌揚扞典則攸存故行焉而不窮體裁旣得亦
言焉而不疚將於此徵文而文足徵於此考獻而獻可考天下
信之百世傳之實在此矣侯以劍南理學名儒來蒞茲土初至
崇儒術惠災黎其政績將上達

孝豐縣志

原序

八

楓宸紀文彤史矣故其董率羣英刻期編纂衷前志以徵信而
補所未備其文倍加簡嚴凡所登記巨細精詳道藉以明義由
以立雖豐邑建自勝國歷紀不過二百餘年而人文事蹟就所
樹立敘次分明其文直其事核不虛美不徇物謂之實錄豈不
信然其間采輯成書者則有明經張暹文學王美中實身其事
焉余得藉手告成廁名簡末以垂不朽皆羅父母之所賜哉余
將之麗水瀕行之日敬附數言於後是爲敘康熙十二年癸丑
春仲古虞李煥文序

郡邑之有志所以考方輿記風土倣漢班固地理志而踵之以成書者也明憲廟時詔儒臣修一統志稱全書焉自是厥後建置不一損益因革詳略或殊其間名宦人物暨諸俗盛衰阨塞要害使無以紀之其何以網羅舊聞作鑿方來乎今

上御極之十有二年適當車書輯壹玉帛來朝之會天下郡縣咸集成書而獻之用以備采風資政治非偶然也豐初無志草創於郭繼修於黃距今七十有二載故老耆舊無一存者訪求散軼哀輯惟艱邑侯羅令君集二三同人互相商榷仍前志類纂復廣所未備次爲十卷越三月告成草凡三易手爲論定者

孝豐縣志

原跋

九

則羅令君西溪旁咨可否者則呂職方半隱而進與王子美中亦與有微勤焉則甚矣邑志之難也蓋志他邑難而志豐邑尤難豐之新建非若曲阿地古歷千有餘年也大要如毘陵之靖江始置於成化之中葉吳淞之婁縣重設於順治之初年事蹟簡而易盡聞見略而難賅以秩官則煦煦若冬日矣以人物則落落如晨星矣雖有鴻筆之士安能飾美以相增益哉然而漢爲鄞縣則其地猶古也民皆敦樸女競懷貞則其風猶古也山則截嶽水多清駛則其景物猶古也前督學黎公博菴李公介五稱豐人士不下程安長德諸望邑則其人文猶古也使上下其期於古處而司牧者以古龔黃之治治其民司訓者以古蘇

湖之教教其士而民不猶爲古之民士不猶爲古之士者未之有也況是書也義例謹嚴雖善善欲其長而一字之褒不敢不愼者正安定所謂傳心要典春秋之微詞寓焉卽如所載列女惟身後論定而後得書焉此物此志也夫然則是書也攷諸已往傳信將來俟之有造于豐邑其功詎淺鮮哉不揣固陋竊附數言於末是爲跋康熙癸丑歲上巳邑人張暹跋

孝豐縣志書後

周禮大司徒之職掌建邦之地圖與其人民之數而職方懷方
形方諸氏又隸於大司馬所以攷地域辨土宜致方物正封疆
灋至善也孔子作春秋亦因子夏得百二十國寶書蕭相國佐
漢龍興風雲沛礪功勛爛焉以入秦先收圖籍之故志也者雖
史家之支流餘裔而徵文攷獻足以經緯區寓彌綸彛憲囊括
眾有橐籥羣生無才識學三長亦不免爲劉知幾所嗤耳孝豐
自明宏治始分安吉爲縣舊志多闕略迨 國朝定鼎規脩於
吾蜀南充羅先生爲賡閱二百餘年又遭粵寇之變陵谷滄桑
而義夫節婦斷脰捐軀撐螳臂以柱綱常黃梨洲所謂冷風熱

跋

一

血洗滌乾坤者固大有人在微闡而哀緝之則劉君濬之力也
其書雖不及武功朝邑志之簡括而詩詞題詠係於山水人物
行誼賅於列傳與段若膺氏之富順縣志或庶幾焉每慨近代
郡縣志非失之雜則失之陋門功闕望稱引連篇有同譜牒以
及無謂之標題從同之風尙不經之小說私立之主名雜而靡
等穢史矣烏乎觀甚且創述不分源流莫別借楚才爲晉有填
計簿作方書陋而誣直野史矣烏乎觀劉君固佼佼者延聘有
通儒五載無促晷宜其若斯之詳明也獨惜君逝世未久而板
片因事皮藏官書局光緒乙未議領回不果今又八年矣去冬
予蒞任索覽偏覓不得轉輾得之蓋僅有存者設再數十年蟲

鼠之所蝕風雨之所摧并此僅可得者而亦不得矣夫左氏譏
籍談忘祖漢書紀揚子方言一髮千金良可寶貴故不謀於衆
流萬生潮省試賚緝攜回他日有鴻筆篇家訂訛補缺則雲門
濫觴於土鼓大輅權輿於椎輪當亦鈎鈇摩研而無文獻不足
之憾也已光緒二十有九年歲在癸卯秋八月權知孝豐縣事
賜進士出身奉政大夫綿州陳漳辛湄甫跋於勤政堂

凡例

一孝豐自兵燹後典籍無存遍為訪求始得康熙十二年舊志一部記載疎略似迫促所成新修郡志記事詳明得體可資法式惟孝邑僻處偏隅文獻既屬無徵搜羅尤為匪易殘缺之憾在所難免

一舊志圖及景物而學宮反闕緩急失宜茲補圖學宮而芟山水重教化輕遊觀也縣境圖改用開方法增注鄉圖山水道路關隘便檢閱而有實用

一舊志有從芟者詩見藝文而山川下先注有某某詩人物各有傳而于科目職官下又詳行誼藝文中復載墓志詩章則

孝豐縣志

凡例

兼及道中懷人之作未免煩複茲悉為酌其去留方輿門載

名勝二十景

日仙溪春渡日董嶺分源日南嶼聳翠日龍池應禱日浮玉晚嬌日五山觀奕日西溪釣雪日

郭笑尋梅日南山天馬日水口石印日景水交花日靈巖滴翠日瀦溪石語日古澗虹飛日青山噴蜴日烏石呼龍日化巖仙跡日張塢石佛日夫溪山秀爽四時改觀即一壑一邱龍巖瀑布日石門古松

而流連不盡鑿而表之矜其多毋乃適形其淺耶似不如節之以免習套

一有從增者學校門之樂章文武之學額武備門之防兵額數科貢門之副貢皆制度所關不當脫略方輿門添沿革表以清眉目旁覽志添金石類以廣搜羅藝文志添著述類以彰文事